

## Leabhair an Uachtaráin

### Ceist 1

Beidh tú ag féachaint ar ball ar thuairisc faoi leabhair a bhronn an tUachtarán ar leabharlanna i mBaile Átha Cliath. Sula bhféachfaidh tú ar an mír, an féidir leat féin agus an duine in aice leat brí na bhfocal seo a aimsiú?

1. cáil
2. seilbh
3. bailiúchán
4. sciar
5. cuir san áireamh
6. sínithe
7. dírbheathaisnéis
8. na rialtais áitiúla
9. na háiseanna
10. dul chun cinn

---

---

---

---

---

---

---

---

---

---



Féach ar an mír den chéad uair le feiceáil an gcabhróidh sé sin libh na focail a thuiscint.

### Ceist 2

Éist leis an mír den dara huair, agus ansin pléigh ábhar na míre leis an duine in aice leat.

### Ceist 3

Féach ar an mír arís, agus freagair na ceistanna seo thíos:

1. Cén cháil atá ar Uachtarán na hÉireann?
2. Cá raibh Micheál D. Ó hUiginn inniu?
3. Cé mhéad leabhar a chuir sé ar fáil?
4. Cén fáth a bhfuil leabharlanna an-tábhachtach, de réir an Uachtaráin?
5. Conas is féidir teacht ar na leabhair seo?

**Ceist 4** ‘...bhronn...’

Bain úsáid as na briathra seo thíos chun ceisteanna a chur ar an duine in aice leat faoin méid a rinne siad an deireadh seachtaine seo caite:

*téigh, ceannaigh, faigh, abair, feic, déan, imir, ith*

Comhrá samplach:

- *An ndeachaigh tú aon áit ag an deireadh seachtaine?*
- *Chuaigh. Chuaigh mé go dtí taispeántas ealaíne den scoth.*
- *An ndeachaigh? Cén áit a raibh sé?*
- *Bhí sé i nGailearaí Náisiúnta na hÉireann.*
- *Cén cineál taispeántais a bhí ann?*
- *Taispeántas ealaíne comhaimseartha. Bhí sé an-mhaith.*
- *Ní maith liom ealaín chomhaimseartha mar ní thuigim í.*

**Ceist 5** ‘...bileog...’ agus ‘leabharlann...’

Féach ar na hiontrálacha thíos atá ar [www.tearma.ie](http://www.tearma.ie):

GA **bileog\_bain2**▼  
*gu* bileoige, *ai* bileoga, *gi* bileog

GA **leabharlann\_bain2**▼  
*gu* leabharlainne, *ai* leabharlanna, *gi* leabharlann

Anois bain amach na lúbíní sna habairtí thíos agus cuir an fhoirm cheart den ainmfhocal sna bearnaí.

1. Tá an (bialann) \_\_\_\_\_ Iodálach sin go hiontach!
2. Is breá liom dath na (duilleog) \_\_\_\_\_ le linn an fhómhair.
3. Dún an (fuinneog) \_\_\_\_\_ mar tá na (cuileog) \_\_\_\_\_ ag teacht isteach ón ngairdín.
4. Nach bhfuil seoladh na (saotharlann) \_\_\_\_\_ le fáil ar an idirlíon?
5. Is mór an trua go bhfuil gúna na (bábóg) \_\_\_\_\_ stróicthe.
6. Feicfidh mé thú ag an (pictiúrlann) \_\_\_\_\_.
7. Tá líon na (dánlann) \_\_\_\_\_ ag méadú gach bliain.

**Ceist 6** Pléigh na cineálacha leabhar thíos leis na daoine eile i do ghrúpa:

Leabhair fantaisíochta  
Leabhair ficsein eolaíochta  
Leabhair uafáis  
Leabhair scéinséara  
Leabhair ghrá  
Leabhair bhleachtairéachta  
Leabhair bheathaisnéise

## Treoracha agus Freagraí

### Ceist 1

- |                        |                              |
|------------------------|------------------------------|
| 1. cáil                | <i>reputation</i>            |
| 2. seilbh              | <i>possession</i>            |
| 3. bailiúchán          | <i>collection</i>            |
| 4. sciar               | <i>share</i>                 |
| 5. cuir san áireamh    | <i>take into account</i>     |
| 6. sínithe             | <i>signed</i>                |
| 7. dírbheathaisnéis    | <i>autobiography</i>         |
| 8. na rialtais áitiúla | <i>the local governments</i> |
| 9. na háiseanna        | <i>the facilities</i>        |
| 10. dul chun cinn      | <i>progress</i>              |

### Ceist 2

Féach an script.

### Ceist 3

Féach an script.

### Ceist 4

Téigh: An ndeachaigh...? Chuaigh / Ní dheachaigh  
Ceannaigh: Ar cheannaigh...? Cheannaigh / Níor cheannaigh  
Faigh: An bhfuair...? Fuair / Ní bhfuair  
Abair: An ndúirt...? Dúirt / Ní dúirt  
Feic: An bhfaca...? Chonaic / Ní fhaca  
Déan: An ndearna...? Rinne / Ní dhearna  
Imir: Ar imir...? D'imir / Níor imir  
Ith: Ar ith...? D'ith / Níor ith

### Ceist 5

1. Tá an **bhialann** Iodálach sin go hiontach!
2. Is breá liom dath na **nduilleog** le linn an fhómhair.
3. Dún an **fhuinneog** mar tá na **cuileoga** ag teacht isteach ón ngairdín.
4. Nach bhfuil seoladh na **saotharlainne** le fáil ar an idirlíon?
5. Is mór an trua go bhfuil gúna na **bábóige** stróicthe.
6. Feicfidh mé thú ag an **bpictiúrlann**.
7. Tá líon na **ndánlann** ag méadú gach bliain.

### Ceist 6

Is féidir gach grúpa a chur ag déanamh an phlé seo agus ansin cuid de na ceisteanna a phlé leis an rang iomlán. Is féidir chomh maith na ceisteanna seo a leanas a scríobh ar an gclár chun cuidiú leis na foghlaimoirí an plé a dhéanamh:

*An maith leat a bheith ag léamh?*

*Cad iad na saghsanna leabhar is fearr leat?*

*An bhfuil cur amach agat ar na seánraí atá sa liosta?*

*An féidir leat sampla de gach seánra a sholáthar?*

*Cad é an leabhar is fearr a léigh tú riamh? Déan cur síos air.*

### **Eimear Ní Chonaola**

Bhur gcéad fáilte ar ais. Anois, is fada cáil na litríochta ar an Uachtarán Michael D. Higgins, agus ní haon iontas mór é go bhfuil bailiúchán leabhar fairsing ina sheilbh aige. Inniu, bhronn sé sciar den bhailiúchán sin ar leabharlanna na tíre, agus beidh siad ar fáil don phobal le léamh as seo amach.

### **Sinéad Crowley**

Bhí an tUachtarán, Micheál D. Ó hUigínn, ina leabharlann áitiúil inniu, i gCabrach i mBaile Átha Cliath, chun bailiúchán seacht gcéad leabhar a thabhairt do mhuintir na tíre.

Tá na leabhair seo i dteangacha éagsúla, Gaeilge san áireamh dar ndóigh, agus tá bileog istigh orthu ag rá go bhfuil an tUachtarán tar éis an leabhar a thabhairt go dtí an leabharlann mar bhronntanas.

Tá cuid de na leabhair sínithe ag na húdair agus tá gach saghas leabhair i gceist – ficsean, dírbheathaisnéis agus leabhair do pháistí san áireamh. Labhair an tUachtarán faoin dúil mhór atá aige féin i leabhair agus i gcúrsaí litríochta.

### **An tUachtarán, Micheál D. Ó hUigínn**

Tá na leabharlanna fíorthábhachtach agus níos tábhachtaí anois ná mar a bhí siad riamh. Agus, go háirithe<sup>1</sup> na háiseanna a chuireann siad ar fáil saor in aisce mar is cuid den saol poiblí<sup>2</sup> iad. Agus, tá eolas agam faoin chuid is mó de na leabharlanna, mar shampla Pearse Street, agus is iontach an dul chun cinn atá déanta. Agus, tá súil agam ó thaobh na gcúrsaí ... na rialtais áitiúla éagsúla ... aon rud a chuireann siad leis na háiseanna do na leabharlanna, tá siad ag tabhairt díreach don phobal iad. *So, ah no*, níl aon rud níos tábhachtaí ná leabhair.

### **Sinéad Crowley**

Is féidir le muintir an phobail na leabhair a fháil ar iasacht ón leabharlann timpeall na tíre, nó staidéar a dhéanamh orthu ann.

Sinéad Crowley, Nuacht TG4, Baile Átha Cliath.

---

<sup>1</sup> *ach go háirithe* a dúradh

<sup>2</sup> *phobal* a dúradh